

UniMAP Optimumkan Kebolehpasaran Graduan Melalui Program CEO

ARAU, 19 Jan (Bernama) -- Universiti Malaysia Perlis (UniMAP) sentiasa berusaha mengoptimumkan kebolehpasaran graduan universiti itu melalui program-program yang dirangka dalam Program Fakulti Ketua Pegawai Eksekutif (CEO), kata Naib Canselor UniMAP Datuk Prof Emeritus Dr Kamarudin Hussin.

"Dalam usaha mengukuhkan program teras, UniMAP mengambil inisiatif bekerjasama dengan syarikat peralatan terkemuka dunia, B.Braun yang mempunyai kepakaran dalam bidang teknologi perubatan terkini dan farmaseutikal.

"UniMAP di bawah Pusat Kerjasama Industri dan Agensi Kerajaan serta Pusat Kecemerlangan Industri Kluster Penjagaan Kesihatan (ICoE Healthcare) membuka peluang kepada pelajar UniMAP menjalani latihan industri di B.Braun yang berpusat di Pulau Pinang melalui Program Latihan Amali Berstruktur," katanya.

Beliau ditemui pemberita selepas Program Fakulti CEO-'Envision Your Future' bersama Presiden B.Braun Kawasan Asia Pasifik, Anna Maria Braun di Dewan Kecemerlangan UniMAP, di sini hari ini.

Turut berangkat, Raja Muda Perlis Tuanku Syed Faizuddin Putra Jamalullail dan puteri sulung baginda Sharifah Khatreena Nuraniah Jamalullail.

Keberangkatan baginda berdua disambut Pengarah Bahagian Hubungan Industri Kementerian Pendidikan Tinggi Dr Arham Abdullah, Kamarudin dan pegawai kanan universiti berkenaan.

Pada program itu, Anna Maria berkongsi pengalaman mengenai perjalanan hidup beliau bermula sebagai seorang pelajar undang-undang di sebuah universiti di Jerman, sebelum menceburi bidang perniagaan dalam industri teknologi perubatan dan farmaseutikal yang diusahakan secara turun temurun oleh keluarga Braun sejak enam generasi terdahulu.

"Tidak penting di mana kita bermula, tetapi bagaimana pengakhiran kita kerana tidak semua yang diusahakan bakal menempa kejayaan seperti dirancang," katanya.

Anna Maria berkata sudah menjadi tanggungjawab baginya sebagai ahli korporat untuk memberi input berguna kepada masyarakat terutama kepada golongan pelajar.

"Saya memang meminati perkara seumpama ini (memberi syarahan umum). Secara tidak langsung, saya dapat berkongsi kepada mereka tip dan nasihat berguna untuk maju dalam sesebuah perniagaan.

"Di B.Braun, kami sangat mementingkan kepakaran dalam penyelidikan dan pembangunan (R&D) dan kilang kami yang beroperasi di Pulau Pinang menjadi penanda aras kepada hub pengeluaran utama kami di Malaysia," katanya.

Untuk rekod, Braun merupakan Profesor Adjung Negara yang dilantik secara rasmi oleh Kementerian Pendidikan Tinggi, dan turut terlibat dalam Program Fakulti CEO, yang membariskan CEO syarikat-syarikat terkemuka di Malaysia untuk berkongsi pengalaman dan tunjuk ajar melalui ceramah motivasi atau sebagai panel penasihat di 22 universiti awam.

Sesi perkongsian yang berlangsung selama tiga jam itu, dihadiri kira-kira 600 pelajar dan ahli akademik UniMAP.

Dikeluarkan oleh :

Unit Media UniMAP